


# d'Räppli



## Fasnacht 2009

Im Konsum deert im Spaalemäart gsehsch aini ummelauffe,  
am Wägeli e Luppe dra, doch duet si gar nyt kauffe.  
Doch wenn si froogsch, wiesoo sis macht, do maint das zarte Wäase,  
so kaani s'Moorgetraining mache und no Zytig lääse.

E Drämli Linie gits nai, diräggt ins Schwoobeland,  
CH Zytig zaigt e Ziircher Dram, das isch allerhand.  
Nai, das isch e Superhit, mir wurde das au loobe,  
D'Schwoobe zu de Ziircher und Ziircher zu de Schwoobe.

Das schwarzi Loch in Gänf und die Uurzyt-Knallmaschiine,  
do sin uns Gedangge vo däm Blocher grad erschiine.  
Baidi sin sehr äänlig ung gfäärligg in jedem Fall,  
denn dr Blocher het sit Uurzyt, scho e riise Knall.

Oh Barbara, oh Angela, Sabrina und Patrice,  
Caroline und Lillyfee und Sandy sinn uf Yys.  
Em Boris Becker stelle mir den bald emol e Gsuech,  
mit somne Gsicht vvyli Fraue zhaa, do kunnsch ins Guinnessbuech.

Dr Schuemacher dä armi Maa, mues jetz in Bangsioon,  
fir das ass äär nim schaffe cha, griegt äär e Fescht als Lohn.  
Dreihundertdausig Fränggli sin doch e glaine Boschte,  
wenn de umme luege duesch, was hit dr Strom duet choschte.

D'EU schafft dr Krümmigsgrad vo allne Gmies grad ab,  
si derfe wachse wie si wänn und mache nümme schlapp.  
Mir frooge uns worum das Gsetz d'Finanzwält nit au griege,  
d'Bangge, wo doch so vvyli, krummi Dinger biege.

Bschisse, stääle, so duet sich d'UBS präsentiere,  
doch dr Ospel will sich z'Basel rehabilitiere.  
Drum het äär si schwerverdiente Bonus brav zruugg gschiggt,  
und dr näggschti Schnabelbryys, isch au scho wider gstriggt.

Am Ziircher Fluugplatz hämmer miese yy go tschegge,  
do gseesch die Zöllner dert, pletzligg haillos verschregge.  
Am Zoll hän mir die Wyysig vvyli z'vvyli weertligg gnoo,  
und sin denn ganz Fiidleblutt, durch dää Naggtscanner koo.

Dr Niggi Schöllkopf haig letschthin richtig gräftig gspunne,  
wel si Dänggmool uusesaicht, dr nayi Ueli Brunne.  
Dr Stai sig tauglich und beesi Zunge geen jetzt hart ins Gricht,  
au dr Niggi Schöllkopf sig doch, männgmool nit ganz dicht.

E wunderscheene Bluemegaarte liigt um unser Huus,  
vvyli Stunde voller Hyygoob, Gäld und Muskelpfuus.  
Doch jessesnai i grieg e Schock, was isch denn do basiert,  
es isch kai Wildsau, nai mi Maa het grad si Jeep parkiert.

Dr Obama haig me gheert, und das isch sehr scheen,  
het Verwandti uus dr Schwyz und Ämitalergeen.  
Au sonigi uus Afrika nur äär macht kaini Dänz,  
doch mit de Änglischgeen macht äär, im Charles no Konkurrenz.

Dr Traugott isch mi Goldfisch, äär het villerlei Beschwärde,  
Hüftarthrose, Altersgicht, e arme Tropf uf Äärde.  
Vom Tierschutz griege mir denn no e Stäärbehilffadrässe,  
doch sythäär het en laider, unseri Katz scho grässe.

An dr letschte Miss Schwyz Waal sait aini ganz verbyse,  
ass si iiri gstraffe Brischtli nie me wotti misse.  
E anderi maint, Fiidle lifte sigi au scho d'Reegel,  
s'ainzig wo an mir no ächt isch, das sin d'Zeechenegel.